

YAĞUBİ NOMƏ

VƏSƏ

«*Yağubi Nomə*» dınyoədə bıə bə həmə imoniyon nıvıştə bıə. Bı nomədə təcrubədə beşə təlimoton, nəsyəton iyən hikmətinə məsləhaton hestin. Yağub bə imon oməkəson məsihiyə mınosibəton iyən rəftoron omuteyro məcazi mənəədə kali ifodon oko doydə.

Yağub de imoniyon noxtə-nəzəri vey movzuyon əhotə kardeydə. Əv ıstə nomədə tənxo, beçizəti, dəvinon, çokə rəftor, imon iyən əməlon, zıvoni idorə karde, mudrikəti, mınəqışon, ğuddə iyən itoətkorəti, co kəson mihokimə kardey, şəhn kardey, səbr iyən co vocibə movzuyon həxədə nıvıştəydə. Yağub ıstə nomədə bə imoniyon məsləhat zıneydə ki, əvon ıstə jimonədə de imoni bə ico bə əməlonən dığğət kardəninin.

Kitobi məzmun:

- 1:1-18 ıstə imonədə ğoym bıbən
- 1:19-27 Məsey iyən əməl kardey
- 2:1-13 Tərəfkeşəti məkən
- 2:14-26 İmon iyən əməlon
- 3:1-12 Zıvoni ğudrət
- 3:13-18 Əsıl mudrikəti
- 4:1-17 Bə Xıdo tabe bıbən
- 5:1-6 Bə ərbobon çəşnavi
- 5:7-20 Səbrmand bıbən

1

ıstə imonədə ğoym bıbən

¹ Çe Xıdo iyən Rəbb İsa Məsihi xıdmətkor az Yağubiku səlom bıbu bə co milləton arə pevılo bıə donzə ğəbilə!

² Ha imoniyə boon, bə har curə dəvinə eqıneədə ımi boştə yolə şoyvo hisob bıken.

³ Oxo şımə zıneydəşon ki, şımə imoni dəvinə kardə bey şımə durumi ğoym kardeydə.

⁴ Şımə durum anə ğoym bıəninə ki, şımə detosə oxoy dırıst iyən mıkəmməl bıbən, hiç qıləy noxsanon nıbu.

⁵ Qırəm şıməhon kom qıləyni mudrikəti rəseydəmıbo, bıdə əv de səxa iyən mızəmmət nıkardə doə Xıdoku əjo bıkə, bəyən doə bəbe. ⁶ Əmma bıdə hiç şək nıvə,

de imoni əjo bıkə. Oxo şək vardə odəm bə dıyo ləpə oxşəş doydə ki, vavaz əy rost kardeydə iyən çı tonə bə ton tojneydə. ⁷ Bıdə jəqo odəm umudəvo nıbu ki, Rəbbıku jıçıy səy bəzne. ⁸ Əv beğərore, ıştə əməlonədə sabitğədəm ni.

⁹ Bıdə beçizə imoniyə boə fəxr bıkə, keynə Xıdo əy barz kardeydə, ¹⁰ ərbobə imoniyə boən fəxr bıkə, keynə Xıdo əy beğurb kardeydə, çumçıko çəy tənxo bənə daştı vılı faniye. ¹¹ Həşi peməy, boxor be puzə pələşk be, vıl eməy, çəy reçinəti məhv be. Jəqoən ərbob pələşk bəbe ıştə koon lap cəlcəliyə vaxtədə.

¹² Baxtəvərə ə odəm ki, bə dəvinon tov vardeydə, çumçıko əv dəvinəo beşe bəpeştə Xıdo Bəştə piyəkəson vəd kardə jimoni taci bəste. ¹³ Bıdə dəvinə kardə bıkəson hiç qıləyni nıvotı ki: «Xıdo mını dəqijneydə». Xıdo de şəri dəqijniye əbını iyən Əv İştənən hiç kəsi dəqijneydəni. ¹⁴ Əmma har odəm ıştən-ıştəni dəqijneydə: çəy ıştə ehtirosən əy cəlb kardeydən iyən də dast dəğandeydən. ¹⁵ Ehtiros esə boy, moyə qəteydə qıno hasil kardeydə. Qınoən rəsencə, marde vardeydə.

¹⁶ Çımı azizqiromiyə boon, ıştən-ıştəni bə dast dəməğandən! ¹⁷ Nemət doə bıə har çiy iyən har qılə mıkəmmələ baxşə peyo omeydə, Nuri səvon bıə Pıəku ki, hiç qıləy dəqişi iyən dəpuşiyey ni Bəyku. ¹⁸ Əy Bəştə irodə mıvofığ de həğiğəti kəlomi əməni bə dınyo vardışe ki, əmə Çəy ofəyəyon nubeynə bıbəmon.

Məsey iyən əməl kardey

¹⁹ Əve ıştə yodədə oqətən, çımı azizə boon: bıdə har qılə inson bo məse tadi bıqəti, bo cəvob doy tadi nıqəti iyən ıştə gəzəbi ohaştı. ²⁰ İnsoni gəzəb çe Xıdo piyə salehəti hasil kardeydəni. ²¹ Əve şımə har curə nopokəti iyən bə dınyo pevilo bıə bevəcətion bə kəno şodən. Xıdo bəşmə dil kaştə iyən şımə conı xılos karde zınə kəlomi de itoəti gəbul bıkən.

²² Bə Kəlomi əncəx quş doəkəs məbən, əy bə vırə rosniyəkəs bıbən, nekneki ıştəni bə dast dəbəğandəşon. ²³ Oxo har kəs ki bə Kəlomi əncəx quş doydə, əy icro kardeydəni, əv bəştə ovəynədə diyə kardə odəmi oxşəş doydə: ²⁴ əv edyəsəy bəştə, əmma ovəynə vəo okıriyencən, həni ıştə simo bəştə yod varde zıneydəni. ²⁵ Əmma bə mıkəmmələ gəanuni, ozodi vardə gəanuni, de dığğəti diyəkardəkəs, həməən bəy rioyət kardəkəs, əy ıştə yodo bekində məsəkəs ni, əmələdə icroəkəye, jıqo odəm əsıl baxtəvərə!

²⁶ Ehanə kiysə ıştəni momin zıneydəbu, əmma ıştə zıvoni idorə karde zıneydənıbo, əv ıştəni bə dast dəğandeydə, çəy mominətiyən puçe. ²⁷ Pıə Xıdo huzurədə pok iyən benoxsanə mominəti ime: tı bə səğiron iyən vevə jenon çəvon qonə rujədə dast bıqəti iyən çı dınyo nopokətiku ıştəni niğo bıdəy.

2

Tərəfkeşəti məkən

¹ Çımı imoniyə boon, şımə bə izzətinə Rəbb İsa Məsihi imon vardəyone, tərəfkeşəti məkən. ² Fərz bıkəmon ki, bəşmə qırdə bıə vırə gızılə anqışte dənoə, tanədəş bohoyne libos bıə qıləy ərbobə odəm iyən nimdoşə olətbətanə qıləy beçizə odəm oməy.

³ Qirəm şimə bə bohoyne olətbətanə odəmi, bivoton: «Bınışt iyo, ivrə çokə vırəy», əmma bə beçizi bivoton: «Tı pəmand əyo» yaanki «Bınışt eposə, çımı lınqonku»,
⁴ bəvədə şimə insonon arədə fərgə noə bevəcə fikirsoybə hakimi gəzinə rəftor kardeydənişon?

⁵ Quş bıdən bəmi, çımı azizə boon! Xıdo bı dınyoədə beçizon səçın kardışe ki, bıdə əvon deştə imoni ərbob bıbun iyən Çəy Bəştə piyəkəson vəd kardə Podşoəti varis bıbun. ⁶ Əmma şimə hurmət noydəniyon bə beçizi. Bəqəm ərbobon bəşmə zılm kardeydənın, bəqəm əvon şiməni bə məhkəmon şıkırneydənın? ⁷ Bəqəm əvon, şimə məxsus bıə bə həmonə barzə Nomi kufr kardeydənın?

⁸ Mıgəddəsə Nıvıştəyədə Xıdo Podşoəti gənan ıme: «Bıpiyən ıştə hamsiyə, bənə ıştəni». Qirəm şimə bımi əməl kardeydəşonbo, bəvədə şimə çok kardeydəşon.
⁹ Əmma qirəm şimə tərəfkeşəti kardeydəşonbo, şimə qıno kardeydəşon, həməñ Ğanun ittıhom kardeydə şiməni əy dəqordıneədə. ¹⁰ Oxo ə odəm ki, bə həmə Ğanuni əməl bıko, əmma bəçəy qıləyni əməl nıko, əv həmə Ğanuni dəqordıneydə. ¹¹ «Zino məkə» votəkəsi, həmçinın «ğətl məkə» votəşe. Qirəm tı zino kardeydəniş, əmma gətl kardeydəşbu, tı Ğanuni dəqordıneydəş.

¹² Xıdo şiməni de ozodi vardə ilahi gənanı mıhokimə bəkarde. Bımi əsosən qəp bıjənən iyən hərəkət bıkən. ¹³ Çumçıko məhkəmə bə mərhəmət nişo nıkardekəsi mərhəmət nıbəka. Mərhəmət bə mıhokimə gəlib omeydə.

İmon iyən əməlon

¹⁴ Çımı imoniyə boon, ehanə odəm voteydəbu, az imonsoybim, əmma əməliş ni, çımı çı foydəş heste? Jəqo imon əy xılos karde bəzne bəqəm? ¹⁵ Ehanə ıştı imoniyə boə, yaan hovə nişə olət bo tankarde, rujəhard nişebu bo harde, ¹⁶ əmma şiməhon qıləyni voteydə bəy: «Bışən Xıdo bəşmə koməq bıbu, ıştəni bıtospınən iyən siconi bəhən!», əmma ıştən bəçəvon jimoniro lozim bıə çıyon bəvon nıdo, çımı çı foydəş bəbe? ¹⁷ İmonən jıqoye, ehanə əməliş nıbo, imon coylınə qıləy mardəye.

¹⁸ Əmma qıləy xonəxo bəvotə: «İştı imon heste, çımı isə əməl». Nişo bıdə bəmi ıştə imoni beəməl, azən nişo bədom bəti ıştə imoni ıştə əmələdə! ¹⁹ Tı bovə kardeydəş ki, Xıdo iqləye. Çok kardeydəş! Cınonən bovə kardeydən iyən larzeydən. ²⁰ Əmma tı, ha nodonə odəm, zıneydəş ki, imon beəməl beədə bə hiçi qərək ni? ²¹ Bəqəm çəmə əcdod İbrahim, ıştə zoə İsağı bə ğırbonqo noədə, ıştə əməlon mıgəbilədə saleh hisob kardə nıbe? ²² Vindeydəş, imon deçəy əməli ivırədə fəoliyətədəbe, həməñ çəy imon deçəy əməlon mıkəmməl be. ²³ Jıqonə, Mıgəddəsə Nıvıştəy bə vırə rəsəy: «İbrahimi imon vardışe bə Xıdo, ım boəy salehəti hisob kardə be», əve bə İbrahimi çe Xıdo dust votəbe.

²⁴ Vindeydəşon, inson əncəx de imoni ne, deştə əməlonən saleh hisob beydə.

²⁵ Eynən jəqo, bəqəm Xıdo beəxloğə jen bıə Rahavi bəçəy əməli qorə saleh hisob nıkardeş? Əy ıştə kədə gəbul kardışe gəsıdon, çəyoən de co roy əvoni dəro kardışe.

²⁶ Oxo çoknə andom beruf mardəye, imonən jəqo, beəməl mardəye.

Zıvoni ğudrət

¹ Ha imoniyə boon, har kəs mıəllim beyro cəhd nıkə, şımə bızınən ki, əmə mıəllimon həniyən qıləy yolə mihokiməku dəvardəninimon! ² Oxo əmə həmməy vey dəqijyeydəmon. Harki ıştə sıxanonədə dəqijyeydənıbo, ıştə cəmi andomi bə ləğom jəy zınə qıləy mıkəmmələ insone. ³ Əmə bə aspon qəvi ləğom jəydəmon ki, əvoni bəştə tabe bıkəmon, jıqəən həmə cəmdəki idorə kardeydəmon. ⁴ Co qıləy misal bıkəşəmon, qəmiyon çanə yol bıbunən, vavaz əvoni çune bıpiyoşe bıboən, roməvoni dili çune piyeydəşebu, de qıləy qədə sukoni koməqi qəmi idorə kardeydə. ⁵ Zıvonən jəqoye, andomi qıləy qədə uzve, əmma vey şəhn kardeydə. Diyəkən, qıləy qədə zik qıləy yolə vişə suteydə! ⁶ Zıvonən otəşe. Zıvon çəmə andomi uzvon dılədə nohəxəti səvone. Əv bəçəmə cəmi andomi ləkə jəydə, çəmə jimoni bə cəhənnımı otəş oqordıneydə.

⁷ Har curə həyvnonon, pərəndon, luzəfırskardəyon, dıyo məxloğon har qılə cins, insoni tərəfo həmul kardə bıə iyən həmul karde bəbe. ⁸ Əmma zıvoni hiç kəs həmul karde zıneydəni. Zıvon qıləy bəloye ki, hiçki çəy və səy zıneydəni, əv de kıştə zəhə pure.

⁹ Deştə zıvoni əmə bə Xıdo şukur kardeydəmon. Deştə zıvonıən lənət voteydəmon bə Xıdo surətədə ofəyə bıə insonon. ¹⁰ Həm tarif, həməən lənət eyni qəvo beşeydə. Çımı boon, ım jıqo bıənın ni. ¹¹ Çe iqlə honi çəşməo suyə ov iyən şinə ov beşe bəzne bəqəm? ¹² Çımı boon, inciyyə do zeytun, anqıə rəz inci perosniye bəzine bəqəm? Jəqəən suyə honiyo şinə ov ome əzını.

Həğiğiyyə mudrikəti

¹³ Şıməhon dılədə mudrikə iyən dərəkəynə odəmon nin bəqəm? Bıdə əvon deştə çökə jimoni iyən mudrikətiku ofəyə bıə de həliməti ıştə çökə əməlon nişo bıkən.

¹⁴ Əmma şımə dilonədə telə rıvınəti, xudbinə ehtiros hestebu, şəhn məkən iyən həğiğiyyəti bə həşə məjənən. ¹⁵ ım mudrikəti ni. Əv osmonono oməni, əncəx çı dınyokuy, ğeyri-ruhaniyyə iyən iblisiku omeydə. ¹⁶ Oxo konco rıvınəti iyən xudbinəti hestebu, əyo har curə hərkihərki iyən yavə əməl heste.

¹⁷ Əmma osmonono omə mudrikəti, əvvəla, pəke, çəyoən sulhpərvəre, mıloyime, itoətkore, de mərhəməti iyən xəymandə bəhron pure, beğərəze, həğiğiyyə. ¹⁸ Sulh eğandəkəson, sulhi dılədə salehəti bəhrə dıveydən.

4

Bə Xıdo tabe bıbən

¹ Şımə arədə dave iyən həsbəhson səbəb çiçe? Şımə ıştə dılətonədə mıborizə bıbə şımə ehtiroson nin bəqəm? ² Şımə çiçiyəsə orzuyədəşon, əmma əv ni bəşməku. Əve şımə odəm kışteydeşon. Şımə de ehtirosi piyeydəone çiçsə bə dast biyən, əmma əy səy zıneydənişon. Əve şımə həsbəhs iyən dave kardeydeşon de iyəndı. Əmma şımə hiçi bə dast varde zıneydənişon, çumçiko əjo kardeydeşon. ³ Əjo kardeydeşon, əmma səydeşon, çumçiko de bevəcə niyəti bəştə ehtiroson lozim bıəy əjo kardeydeşon. ⁴ Ha xəyonətkoron, bəqəm şımə zıneydənişon ki, de dınyo dust bey, de

Xıdo deşmenəti kardeye? Ə şəxsi ki piyeydəşe de ın dınyo dust bıbu, əv Xıdo deşmene. ⁵ Şımə şıneydəşon ki, Mığəddəsə Nıvıştəy hədər-hədəri voteydə bəqəm: «Xıdo çəmə dılətonədə səbəso kardə rufiro dilisıxtə rıvınəti kardeydə?» ⁶ Əmma Əy həniyən yolə lutf doəşe. Oxo Mığəddəsə Nıvıştəy jıqo voteydə:

«Xıdo bə şənbozon vəynəye,
Bə həlimon lutf kardeydə».

⁷ Jəqobu, bə Xıdo tabe bıbən! Bə iblisi vəynə bımandən, əv bəvite şıməku. ⁸ Nez boən bə Xıdo, Xıdoən nez bome bəşmə. Ha qınokoron, bışıştən ıştə daston, ha beğəroron, pok bıkən ıştə dilon! ⁹ Həftoği bıbən, yas bıqətən iyən bıbəmən! Bıdə şımə sırə oqardı bə bəmə, şoyvo bə ahu-zori. ¹⁰ Rəbbi huzurədə ıştəni saru bıqətən, bəvədə Əv şıməni barz bəkarde.

Çe hiç kəsi bevəci məvotən

¹¹ Çımı imoniyə boon, çe iyəndı bevəci məvotən. ıştə boə bevəci votəkəs, yaan ıştə boə mıhokimə kardəkəs bə Ğanuni vəynə voteydə iyən Ğanuni mıhokimə kardeydə. Ehanə tı Ğanuni mıhokimə kardeydəşbu, tı həni Ğanuni icrokəni niş, çəy səpe bıə hakimiş. ¹² Əmma heste əncəx iqlə Ğanun bıdə iyən xilos kardero Hakim iyən bo məhv karde ğadir bıəy Əve. Bəs tı kiş ki, mıhokimə kardeydəş ıştə hamsiyə?

Ğuddə məkən

¹³ Esətən şımə jıqo voteydon: «İmruj, yaan maştə əmə dəro bəqınemon bə filon şəhr, sori bəmandemon əyo, ticorət bəkardemon, veyə pul ğəzənc bəkardemon». ¹⁴ Şımə hətto zıneydənişon ki, maştə çiç bəbe! Şımə jimon çiçe? Oxo əv bənə hırəçəni i ləzi dılədə bə məydon beşeydə, əlbəholən qin beydə. ¹⁵ Şımə çımı əvəzi jıqo votəninişon: «Qirəm Rəbbi rizo bıbo bəjiyemon iyən filon-filon koon bəkardemon». ¹⁶ Əmma şımə esə deştə ğuddə şəhn kardeydəşon, şənbozəti karde yavə koye! ¹⁷ De jıqoy ə odəm ki zıneydə xəymandə koon kardənine, əmma kardeydəni, əv qıno kardeydə.

5

Bə ərbobon çəşnavi

¹ Esən şımə quş bıdən, ha ərbobon! Bıbəmən, dod-əmon bıkən şıməni çəş kardə bəlon dasto! ² Şımə tənxo pıxə, şımə oləton mırıtı hardəşe. ³ Şımə ğızılı iyən niğə pos vardəşe. Im pos bəşmə vəynə şoydəti bəkarde. Şımə andomi bənə otəşi bəsute mutə bəkarde. Şımə bı oxonzəmonədə xəzinə qırdə kardəyone! ⁴ Imha, şımə hiyonədə ko kardəkəson həxi boştə peqətəyone, əve əvon fəryod kardən, dıven kardəkəson ah-nolə bə Ləşğəron Rəbbi quşi rəsəy! ⁵ Şımə bı dınyoədə eşaeşi dılədə jimon kardəyone, ıştə umri de kefi dəvoniyəone. Kok kardəyone ıştə bo obırniyə ruji, ⁶ bəşmə mığovimət nişo nıdoə salehə odəmon mıhokimə kardəyone iyən kıştəyone.

Səbrmand bıbən

⁷ Əve çımı imoniyə boon, detosə Rəbbi oqardı ruji səbrmand bıbən! Diyəkən, çoknə

kaştevon de səbri çəş kardeydə keynə zəmin ğıymətine məhsuli bə dərhəl bərosne. De kon səbri əv bə çəşe pozi iyən əvəsori voşon! ⁸ Şımənən jəqo səbrin bıbən iyən ıştə dılı ğoyım bıkən, çumçiko Rəbbi oqardə ruj həni neze. ⁹ Çımı imoniyə boon, iyəndiku şikat məkən ki, Xıdo şıməni mihokimə nıkə. Diyəkən, Hakim kəybə qəviku pəmandə!

¹⁰ Ha imoniyə boon, bıdə əzob-əzyət kəşeyədə, Rəbbi Nomo qəp jə peyğəmbəron boşmə səbri iyən eğrorəti nımunə bıbu. ¹¹ Şımə zıneydəşon, əmə bə səbrmandə odəmon baxtəvər voteydəmon. Şımə məsəone Əyyubi tov vardey həxədə, zıneydəşon ki, Rəbbi oxoədə çoknə xəy-dıvo doşe bəy, çumçiko Rəbb mərhəmətin iyən rəhmine.

¹² Çımı imoniyə boon, har çiyse bənav ımı bıvotım ki, ğəssəm məhən: nə bə osmoni, nə bə zəmini, nəənki bə co qıləy çiy. Bıdə şımə «bəle» bəle bıbu, «xəyr» xəyr bıbu ki, bə mihokimə eməqınən.

De imoni kardə dıvo ğıvvə

¹³ Şıməhon arədə əzob kəşəkəs hestebu, bıdə dıvo bıkə, şo bıəkəs hestebu, bıdə ilahi bahandı. ¹⁴ Qirəm şıməhon qıləyni noxəşebu, bıdə çe icmo sipirişon sədo bıkə, əvon boəy dıvo bıkən, de Rəbbi Nomi əy de ruyəni məsh bıkən. ¹⁵ De imoni kardə bıə dıvo noxəşini pəbəroxne, Rəbbən səpo rost bəkarde əy. Ehanə əy qıno kardəşebu, bəvədə baxşə bəbe. ¹⁶ Əve ıştə qınon bo iyəndı etirof bıkən iyən bo iyəndı dıvo bıkən ki, bıdə Rəbb xəş bıkə şıməni. Salehə odəmi dıvo vey zumande iyən təsirine.

¹⁷ İlyasən bənə əmə qıləy odəmbe. Əv dilisıxt dıvo kardeydəbe ki, voş nıvo, əve se sor nim voş nıvoəy bə zəmin. ¹⁸ Əy ijənən dıvo kardışe, osmono voş voəy, zəmini məhsul doşe.

¹⁹ Çımı imoniyə boon, qirəm şıməhon qıləyni həğigəti royku beşəbu iyən şıməhono kiysə oqordıniyəşebu əv bə həğigəti ro, ²⁰ bızınən ki, qınokori səhvə royku oqordıniyəkəs əy mardeyku pəbəroxne iyən çəy vey qınon səpe ebəparçine.